

Образац прилог 3. - Изглед Ознаке за капу;



Na osnovu člana 77. stav 3. Zakona o sudskoj policiji u Federaciji Bosne i Hercegovine ("Službene novine Federacije BiH", broj: 77/20), na prijedlog direktora Sudske policije u Federaciji Bosne i Hercegovine, predsjednik Vrhovnog suda Federacije Bosne i Hercegovine, donosi

**PRAVILNIK  
O IZGLEDU I NOŠENJU UNIFORME I SLUŽBENIM  
OZNAKAMA U SUDSKOJ POLICIJI U FEDERACIJI  
BOSNE I HERCEGOVINE**

**I-OPĆE ODREDBE**

Član 1.

(Predmet pravilnika)

Ovim pravilnikom propisuje se izgled i nošenje uniforme i službenim oznakama u Sudskoj policiji u Federaciji Bosne i Hercegovine (u daljem tekstu: Sudska policija), kao i druga pitanja od značaja za korištenje i nošenje uniforme.

Član 2.

(Uniforma i službene oznake)

- (1) Službenik Sudske policije ima pravo da prilikom obavljanja službenih poslova i zadataka nosi uniformu sa službenim oznakama.
- (2) Službenik Sudske policije zbog specifičnosti prirode određenih poslova i zadataka i u skladu sa prihvaćenim policijskim standardima, određene poslove i zadatke može izvršavati u civilnoj odjeći ili posebnoj službenoj uniformi i sa opremom.

**II-UNIFORME I NJIHOV IZGLED**

Član 3.

(Vrsta uniforme)

Vrste uniformi su:

- a) osnovna uniforma;
- b) taktička uniforma i
- c) posebna službena uniforma.

Član 4.

(Osnovna uniforma)

- (1) Osnovnu uniformu zadužuju svi službenici Sudske policije i kadeti koji se obučavaju za službenika Sudske policije.
- (2) Izuzetno od stava (1) ovog člana, direktor Sudske policije može donijeti odluku da pojedini službenici Sudske policije raspoređeni u određenim osnovnim ili unutrašnjim organizacionim jedinicama, a koji duže taktičku ili posebnu službenu uniformu ili poslove i zadatke izvršavaju u civilnom odijelu, ne zadužuju osnovnu uniformu.

- (3) Sastavni dijelovi, izgled, boja, tehničke karakteristike, rokovi trajanja i način nošenja osnovne uniforme će se utvrditi posebnom odlukom koju donosi direktor Sudske policije.

Član 5.

(Taktička uniforma)

- (1) Taktičku uniformu zadužuju svi službenici Jedinice za specijalističku podršku.
- (2) Izuzetno od stava (1) ovog člana, po ukazanoj potrebi, direktor Sudske policije može donijeti odluku da i drugi službenici Sudske policije zaduže i nose taktičku uniformu.
- (3) Sastavni dijelovi, izgled, boja, tehničke karakteristike, rokovi trajanja i način nošenja taktičke uniforme će se utvrditi posebnom odlukom koju donosi direktor Sudske policije.

Član 6.

(Posebna službena uniforma)

- (1) Službenik Sudske policije iz razloga navedenih u odredbi člana 2. stav (2) ovog pravilnika može dužiti i nositi i posebnu službenu uniformu.
- (2) U zavisnosti od poslova i zadataka službenika Sudske policije, posebna uniforma može biti:
  - a) uniforma vođa službenog psa;
  - b) radna uniforma;
  - c) sportska oprema;
  - d) uniforma za posebne klimatske i geografske uslove;
  - e) građansko odijelo;
  - f) svečana uniforma.
- (3) Sastavni dijelovi, izgled, tehničke karakteristike, rokovi trajanja i način nošenja posebne službene uniforme će se utvrditi posebnom odlukom koju donosi direktor Sudske policije.

Član 7.

(Dodatna oprema)

Službenik Sudske policije, uz uniforme iz člana 3. ovog pravilnika, zadužuje i nosi opremu i oružje za obavljanje poslova, u skladu sa propisom iz člana 78. Zakona o sudskoj policiji u Federaciji Bosne i Hercegovine.

**III- IZRADA, NOŠENJE, ODRŽAVANJE I UPOTREBA  
SASTAVNIH DIJELOVA UNIFORME**

Član 8.

(Izrada i nošenje sastavnih dijelova uniforme)

- (1) Sastavni dijelovi uniforme se izrađuju u standardnim veličinskim brojevima.

- (2) Sastavni dijelovi uniforme za službenike Sudske policije bez obzira na pol, istog su izgleda i tehničkih karakteristika, s tim da su sastavni dijelovi uniforme namijenjeni za službenike Sudske policije ženskog pola prilagođene anatomskoj građi žene.
- (3) O jednoobraznom načinu nošenja sastavnih dijelova uniforme u okviru jedne organizacione jedinice brine rukovodilac osnovne organizacione jedinice.

#### Član 9.

(Održavanje i upotreba sastavnih dijelova uniforme)

- (1) Službenik Sudske policije je zadužen sastavne dijelove uniforme dužan održavati i nositi propisno i u urednom stanju.
- (2) Službeniku Sudske policije nije dozvoljeno prekranje sastavnih dijelova uniforme.
- (3) Službeniku Sudske policije nije dozvoljeno posuđivanje, niti davanje sastavnih dijelova uniforme drugim licima, a posuđivanja sastavnih dijelova uniforme drugom službeniku Sudske policije je dozvoljeno uz saglasnost neposrednog rukovodioca.
- (4) Službenik Sudske policije ne smije van službe upotrebljavati sastavne dijelove uniforme:
  - a) kao učesnik građanskog okupljanja ili javnog protesta;
  - b) za vrijeme udaljenja sa dužnosti / suspenzije;
  - c) za vrijeme korištenja plaćenog ili neplaćenog odsustva.

#### IV-ZADUŽENJE, ROKOVI TRAJANJA SASTAVNIH DIJELOVA UNIFORME I ZAMJENA UNIFORME

##### Član 10.

(Zaduženje i rokovi trajanja sastavnih dijelova uniforme)

- (1) Sastavne dijelove uniforme službenik Sudske policije može dužiti lično ili samo za vrijeme trajanja određene radne aktivnosti.
- (2) Rokovi trajanja sastavnih dijelova uniforme mogu se produžiti za vrijeme dužeg odsustva službenika Sudske policije.
- (3) Rukovodilac osnovne i unutrašnje organizacione jedinice obavezan je redovnim praćenjem briniti o trenutnom stanju, ispravnosti i urednosti sastavnih dijelova uniforme i službenih oznaka koju duži službenik Sudske policije, te kroz izvještaj i plan rada ili druge pisane akte, putem neposredno nadređenog rukovodioca iskazivati eventualne potrebe za nabavkom, zamjenom ili popravkom sastavnih dijelova uniforme.

##### Član 11.

(Zamjena uniforme)

- (1) Zamjena uniforme, odnosno pojedinih sastavnih dijelova uniforme vrši se po isteku propisanog roka trajanja.
- (2) Službenik Sudske policije može i prije isteka propisanog roka trajanja zamijeniti oštećene sastavne dijelove uniforme, ako su isti prilikom korištenja oštećeni, dotrajali ili zbog postojanja drugih opravdanih razloga.
- (3) U slučaju iz stava (2) ovog člana, službenik Sudske policije dužan je neposrednom rukovodiocu podnijeti pismeno obrazložen zahtjev za zamjenu oštećenog ili dotrajalog dijela uniforme, pri čemu je oštećeni ili dotrajali dio obavezan priložiti ili dostaviti na uvid, te eventualno razdužiti.
- (4) Zahtjev iz stava (3) ovog člana se putem direktora Sudske policije, dostavlja Sektoru za pravne, računovodstvene i opće poslove.

##### Član 12.

(Vodenje evidencije)

- (1) Za svakog službenika Sudske policije vodi se evidencija - karton ličnog zaduženja uniforme, odnosno sastavnih dijelova uniforme.

- (2) Evidencija - karton ličnog zaduženja - iz stava (1) ovog člana, vodi se u osnovnoj organizacionoj jedinici službenika Sudske policije.

#### V-SLUŽBENE OZNAKE NA UNIFORMI

##### Član 13.

(Službene oznake na uniformi)

- (1) Na uniformi Sudske policije nose se sljedeće službene oznake:
  - a) amblem sa natpisom Sudske policije;
  - b) amblem sa značkom Sudske policije;
  - c) značka Sudske policije;
  - d) oznaka za kapu.
- (2) Službene oznake iz stava (1) ovog člana, nose se na mjestu i na način utvrđen posebnom odlukom koju donosi direktor Sudske policije.

##### Član 14.

(Amblem sa natpisom Sudske policije)

- (1) Amblem sa natpisom Sudske policije (Obrazac prilog 1. - koji je sastavni dio ovog pravilnika) je u obliku štita, visine 110 mm, širine 90 mm, čiji se gornji dio završava pod uglom od 120 stepeni. Amblem je u osnovi boje uniforme, oivičen trakom zlatnožute boje širine 3 mm, a slova na amblemu ispisana su zlatnožutom bojom.
- (2) Na gornjem centralnom dijelu amblema, u četiri reda, nalazi se polukružni natpis: "Bosna i Hercegovina"; "Босна и Херцеговина"; "FEDERACIJA BOSNE I HERCEGOVINE"; "ФЕДЕРАЦИЈА БОСНЕ И ХЕРЦЕГОВИНЕ".
- (3) Ispod natpisa iz stava (2) ovog člana, u centralnom dijelu amblema, u tri reda nalazi se natpis: "SUDSKA POLICIJA", "СУДСКА ПОЛИЦИЈА" i "СУДСКА ПОЛИЦИЈА".

##### Član 15.

(Amblem sa značkom Sudske policije)

- (1) Amblem sa značkom Sudske policije (Obrazac prilog 2. - koji je sastavni dio ovog pravilnika) je u obliku štita, visine 110 mm, širine 90 mm, čiji se gornji dio završava pod uglom od 120 stepeni. Amblem je u osnovi boje uniforme, oivičen trakom zlatnožute boje širine 3 mm.
- (2) Na gornjem centralnom dijelu amblema, u četiri reda, nalazi se zlatno žutom bojom izvezen polukružni natpis: "Bosna i Hercegovina"; "Босна и Херцеговина"; "FEDERACIJA BOSNE I HERCEGOVINE"; "ФЕДЕРАЦИЈА БОСНЕ И ХЕРЦЕГОВИНЕ".
- (3) U centralnom dijelu amblema nalazi se izvezena značka Sudske policije, osmokrakog oblika, prečnika dimenzija 70 mm, u osnovi zlatno žute boje, u kojoj su s početkom iz sredine simetrično raspoređena polja-kraci zlatnožute boje u obliku sunčevih zraka, čiji se kraci stepenasto završavaju.
- (4) U unutrašnjem dijelu značke, na zamišljenoj kružnici prečnika 50 mm u okvirima tamnoplave boje, širine 6 mm su u zlatnožutoj boji simetrično izvezeni polukružni natpisi: "SUDSKA POLICIJA"; "СУДСКА ПОЛИЦИЈА"; "СУДСКА ПОЛИЦИЈА".
- (5) Na sredini značke je u krugu prečnika 22 mm, zlatnožutom bojom izvezena vaga.

##### Član 16.

(Oznaka za kapu)

- (1) Oznaka za kapu je značka Sudske policije (Obrazac prilog 3. - koji je sastavni dio ovog pravilnika), osmokrakog oblika, bez broja, u osnovi boje uniforme, prečnika dimenzija 50 mm, u osnovi su s početkom iz sredine simetrično raspoređena polja-kraci zlatnožute boje u obliku sunčevih zraka, čiji se kraci stepenasto završavaju.
- (2) U rubnom unutrašnjem dijelu značke, na zamišljenoj kružnici, u ispučenim okvirima u boji uniforme, su u

zlatnožutoj boji simetrično navedeni polukružni natpisi: "SUĐSKA POLICIJA"; "SUĐBENA POLICIJA"; "СУДСКА ПОЛИЦИЈА"; a u sredini značke je u krugu prečnika 22 mm, zlatnožutom bojom izvezena vaga.

#### **VI-NADZOR NAD PRIMJENOM PRAVILNIKA**

##### Član 17.

(Kontrola i nadzor)

Neposrednu kontrolu i nadzor u pogledu namjenskog i jednoobraznog korištenja uniforme, sastavnih dijelova uniforme, oznaka i dodatne opreme dužni su organizovati rukovodioci organizacionih jedinica i službenici unutrašnje kontrole Sudske policije.

#### **VII-PRIJELAZNE I ZAVRŠNE ODREDBE**

##### Član 18.

(Prestanak važenja)

Danom stupanja na snagu ovog pravilnika prestaje da važi Pravilnik o uniformi, dodatnoj opremi i oznakama na uniformi Sudske policije Federacije Bosne i Hercegovine broj Su-sp-44-3/16 od 04.04.2016. godine.

##### Član 19.

(Stupanje na snagu)

Ovaj pravilnik stupa na snagu danom donošenja i bit će objavljen u "Službenim novinama Federacije BiH".


Broj Su-sp-44/22  
08. jula 2022. godine  
Sarajevo

Predsjednica  
Vrhovnog suda  
Federacije Bosne i Hercegovine  
**Vesna Stanković-Ćosović, s. r.**

Obrazac prilog 1. - Izgled Amblema sa natpisom Sudske policije;



Obrazac prilog 2. - Izgled Amblema sa značkom Sudske policije;



Obrazac prilog 3. - Izgled Oznake za kapu;



## JP "LOKOM" D.O.O. SARAJEVO

### 1328

Na osnovu člana 17. i člana 23. Statuta Javnog preduzeća za upravljanje, zaštitu i održavanje objekata u vlasništvu Općine Novi Grad Sarajevo JP "LOKOM" d.o.o. Sarajevo ("Službene novine Kantona Sarajevo", br. 15/13, br. 47/14., br. 29/18., br. 3/22.), člana 30. Poslovnika o radu Skupštine JP "LOKOM" d.o.o. Sarajevo br. 971/22 od 20.05.2022. godine, te Zaključka Općinskog vijeća br. 01-02-12572/21 od 29.07.2021. godine, Skupština JP "LOKOM" d.o.o. Sarajevo, na 1. vanrednoj sjednici održanoj dana 29.06.2022.godine, donijela je

### ODLUKU O RAZRJEŠENJU DUŽNOSTI PREDsjedNIKA I ČLANOVA NADZORNOG ODBORA JP "LOKOM" D.O.O. SARAJEVO

#### Član 1.

Ovom Odlukom razrješavaju se dužnosti Predsjednik i članovi Nadzornog odbora JP "LOKOM" d.o.o. Sarajevo, kako slijedi:

- Jusuf Vatreš - Predsjednik,
- Elmir Šarić - član,

- Dino Svraka - član.

#### Član 2.

Razrješenje dužnosti Predsjednika i članova Nadzornog odbora JP "LOKOM" d.o.o. Sarajevo vrši se iz razloga što su Predsjednik i članovi Nadzornog odbora JP "LOKOM" d.o.o. Sarajevo izgubili povjerenje Osnivača.

#### Član 3.

Odluka stupa na snagu danom donošenja.

Predsjednik i članovi Nadzornog odbora JP "LOKOM" d.o.o. Sarajevo su dužni obnašati preuzete dužnosti do okončanja konkursne procedure odnosno do imenovanja novog saziva Nadzornog odbora JP "LOKOM" d.o.o. Sarajevo.

#### Član 4.

Odluka će se objaviti u "Službenim novinama Federacije BiH", i na oglasnoj ploči Preduzeća.

Broj 1206/22  
29. juna/lipnja 2022. godine  
Sarajevo

Predsjednik  
Skupštine JP "LOKOM" d.o.o.  
Sarajevo  
**Emir Dedović, s. r.**

(SI-994/22-F)